

AKHBAR : BERITA HARIAN

MUKA SURAT : 14

RUANGAN : NASIONAL

## Dr Noor Hisham syukur Belanjawan 2021 lulus peringkat dasar

**Kuala Lumpur:** Ketua Pengarah Kesihatan, Tan Sri Dr Noor Hisham Abdullah mengucapkan rasa syukur berikutan Rang Undang-Undang Perbekalan 2021 (Belanjawan 2021) diluluskan pada peringkat dasar semalam.

"Alhamdulillah. Kita bersama bersepadu teruskan peperangan (menentang) COVID-19," katanya semalam.

Dr Noor Hisham berkata, Kementerian Kesihatan (KKM) yakin semua Ahli Parlimen faham dengan situasi semasa pandemik COVID-19 dan situasi kewangan negara dan fokus sekarang ialah membendung penularan wabak itu serta memberi laluan ekonomi pulih dengan segera.

"Semoga dipermudahkan petugas barisan hadapan untuk meneruskan usaha membendung dan menangani ancaman wabak COVID-19," katanya.

Rang Undang-Undang Perbekalan 2021 (Belanjawan 2021) diluluskan pada peringkat dasar semalam.

Ini diluluskan dengan suara majoriti selepas permohonan beberapa Ahli Parlimen untuk undi belah bahagian tidak berjaya kerana hanya 13 Ahli Parlimen yang bangun, kurang daripada jumlah diperlukan sebanyak 15 orang.

Belanjawan pertama kerajaan Perikatan Nasional (PN) berkenaan dibentang Menteri Kewangan, Tengku Datuk Seri Zafrul Tengku Abdul Aziz pada 6 November lalu dan seramai 82 Ahli Parlimen terbahit dalam sesi perbahasan.

Peruntukan mencecah RM322.5 bilion dicadangkan di bawah belanjawan berkenaan, menjadi jumlah terbesar dalam sejarah belanjawan negara ketika negara berhadapan dengan pandemik COVID-19 dan impaknya terhadap kehidupan rakyat dan ekonomi negara.

Dalam belanjawan itu, Tengku Zafrul mengumumkan peruntukan keseluruhan sebanyak RM31.9 bilion kepada Kementerian Kewangan iaitu kenaikan sebanyak 4.3 peratus, berbanding peruntukan tahun lalu.

Selain itu, petugas barisan hadapan KKM bakal menerima pemberian tambahan secara sekali bayaran sebanyak RM500. BERNAMA

### Penularan COVID-19

# 2,555 kes pulih, 3 kematian

## 935 jangkitan baharu dilaporkan semalam

Oleh Noor Atiqah Sulaiman  
bhnews@bh.com.my

**Putrajaya:** Seramai 2,555 pesakit pulih daripada COVID-19, semalam.

Ketua Pengarah Kesihatan, Tan Sri Dr Noor Hisham Abdullah, berkata jumlah itu melebihi jangkitan baharu semalam, iaitu 935 kes.

Katanya, pertambahan kes pulih itu menjadikan jumlah kumulatif pesakit sembuh sebanyak 49,056 kes bersamaan 80.7 peratus daripada jumlah keseluruhan.

Beliau berkata, jumlah kumulatif kes positif COVID-19 di negara ini ialah 60,752 pesakit.

"Daripada jumlah 935 kes baharu ini, hanya empat kes import yang mendapat jangkitan dari luar negara dilaporkan.

"Bagi kes penularan tempatan, Sabah mencatatkan kes harian tertinggi, iaitu 326 kes baharu atau 34.9 peratus daripada jumlah kes hari ini (semalam).

"Ini diikuti oleh Selangor se-

banyak 161 kes (17.2 peratus) dan Negeri Sembilan 158 kes (16.9 peratus)," katanya semalam.

Dr Noor Hisham berkata, ada tiga kematian disebabkan oleh COVID-19 semalam dan semua kes berlaku di Sabah.

Katanya, kematian itu menjadikan jumlah kumulatif sebanyak 348 kes atau 0.57 peratus daripada jumlah keseluruhan kes.

Beliau berkata, masing-masing satu kematian dilaporkan di Hospital Duchess of Kent di Sandakan, Hospital Queen Elizabeth dan Hospital Tawau.

"Kes kematian ke-346 ialah wanita warganegara berusia 70 tahun dan meninggal dunia di Hospital Duchess of Kent. Kematian ke-347 membabitkan lelaki warganegara berusia 59 tahun yang mempunyai penyakit darah tinggi dan asma.

"Kematian ke-348 pula membabitkan wanita warganegara berusia 77 tahun yang mempunyai penyakit kencing manis dan darah tinggi. Kematian wanita ini disahkan di Hospital Tawau," katanya.

Dr Noor Hisham berkata, enam kluster baharu semalam membabitkan dua kluster di Sabah dan masing-masing satu kluster di Johor, Kuala Lumpur,



**Daripada jumlah 935 kes baharu ini, hanya empat kes import yang mendapat jangkitan dari luar negara dilaporkan.**

**Dr Noor Hisham Abdullah, Ketua Pengarah Kesihatan**

Kelantan dan Pulau Pinang.

Beliau berkata, kluster di Sabah dikesan di daerah Tawau yang dinamakan sebagai Kluster Bot Biru hasil saringan individu bergejala yang sudah menjangkiti 17 individu.

Katanya, bagi kluster dike-

san di Tawau yang dinamakan sebagai Kluster Blok 31, hasil saringan individu bergejala dan sudah menjangkiti 13 kes.

"Kluster ketiga dikesan di Johor Bahru membabitkan syarikat logistik yang dinamakan sebagai Kluster Gemilang, hasil saringan dalam kalangan pesakit Jangkitan Pernafasan Akut Teruk (SARI) dan sudah menjangkiti 26 individu.

"Kluster seterusnya dinamakan sebagai Kluster Tapak Bina Sungai Udag yang dikesan di sebuah tapak pembinaan dalam daerah Kepong, Kuala Lumpur hasil saringan di tempat kerja dan sudah menjangkiti 11 individu," katanya.

Dr Noor Hisham berkata, kluster kelima dikesan di Kota Bharu dan Machang di Kelantan yang dikenali sebagai Kluster Chengal hasil saringan pesakit SARI dan sudah menjangkiti 15 individu.

"Kluster keenam dikenali sebagai Kluster Damar Laut di daerah Timur Laut dan Barat Daya di Pulau Pinang serta daerah Padang Terap di Kedah.

"Lima kes positif pertama dalam kluster ini dikesan positif hasil saringan individu bergejala. Sehingga kini ia sudah menjangkiti 13 individu," katanya.

### Fakta Nombor

# 4.3 peratus

kenaikan peruntukan Belanjawan 2021